


涇川詩話







話 詩 川 涇

著 希 知 趙

編主五雲王

編初成集書叢

涇川詩話

中華民國二十六年六月初版

著者 趙知希

發行人 王雲五  
上海河南路

印刷所 商務印書館  
上海河南路

發行所 商務印書館  
上海及各埠

長

★E八三四

(本書校對者黃逸之)

# 涇川詩話卷上

清 環石趙知希著

吾涇有明前輩。究心理學。多不專以詩名。自王巖潭延與吳中皇甫兄弟唱和。頗有所興起。萬歷間。里人

張東山應泰取唐許文化以下。至於同時諸君子詩。纂爲里音。而本朝侯晉水世來蒞吾涇。取里音而廣之。

續之爲賞音。於是千有餘年之詩。備於此冊。徐崐山開爲之序。書成。晉水作詩以紀其盛。詞云。爲吏每苦

拙。日懷山水盟。撫茲卷帙存。披尋適所性。雞壇恣筆戰。白也稱敵勁。古人猶未遠。同堂可考證。好音集泮

林。志欲化其貌。五斗絆此身。汗焉愧陶令。猷州人物好。大雅如可并。精者擷其奧。糟者亦與迸。心理足默

運。誰謂年代更。東山稱物望。簡編留氏姓。奎文集川西。樂羣應有慶。憑仰毛葩傳。卜言實勳盛。

萬道瑞西源詩草裕佑著。序云。四十年前。涇上專詩者。僅數家。老幹如趙君叔厚崇。禮。穠麗如王君雲從雲。全

聲以風騷自命。後得翟君伯誨忠。孤潔之性。宏放之才。又後得查君子美懿。秀色逸情。從選得力。又胡君

伯承世。遺余新吟。而知髦年老宿。手攬宗風。信一邑之冠冕。今十年之內。五君子者。後先物故。猶幸隣友

有椒衍菴。仲則孫。孝。家庭有伯兄平山萬。從叔右文萬。相與倡予和爾。訂舊哦新。差不寂寞耳。道瑞

名麟。所著有松虬詩草。自明季及國初以來。吾涇詩人。頗萃於此。序所云矣。

余曾祖維生公。當明季時。與同邑萬道吉。宣城沈眉生。蘇民及家雪度。初浣等倡爲南社。後合於吳爲應社。又

謂之復社。以制藝爲同社所推。而詩古文尤不懈。而及於古。今所傳有欽閣詩草。晉水侯公序曰。涇之趙大宗也。其先有朴菴。旋夫。洪泉。行吾。中字以德。諸公。而董五城。左東井。王巖潭。張東山。諸前輩。又其地所產也。一代人文之鄉。流風餘韻。猶有存者。涇雖僻邑。殊多名蹟。如水西。幕山之奇。承流琴溪之勝。維生攜同人而廢和之。奚囊所積。遂以盈帙。大都命景抽靈。匠心軌畫。抒奇碩磊。落之抱。而調以淵懿渾灑之氣。翩翩超先達而上之。蓋深有得於性情之正者。觀晉水之論。足以知所詣矣。

萬道吉與先維生。公交最篤。嘗爲作詩文合序云。予交天下士甚侈。所謂固之以盟誓。重之以婚姻者。宣城沈眉生。同邑趙維生而已矣。維生公別墅在城東。地名甄塘。而萬所居。眉生榜其門曰世夫子里。萬丘爲道

吉之祖。李白嘗稱之爲萬夫子。故云。

天都邵漆夫。晁投以詩云。我家天都峯。僻居罔與比。小築瀾香亭。雅聞足音喜。一旦良朋

會。同志俱鵠起。始因扶風豪。獲覩連城美。今來涇城東。雪山追屐齒。徙倚甄塘間。脈脈一水裏。同訪玉屏園。遙瞻夫子里。如何素心人。天涯隔尺咫。

南社初起。萬道吉嘗爲主盟。甲乙以後。道吉居山尙數十年。有先後遙祭夏彝。仲陳臥子。吳日生。黃蘊生。侯澣道諸詩。其七十初度一律。傷知交之零落。感時事之盛衰。蓋老而見道。自悔自喜。真不朽之名言也。

詩云。憶昔清高。妄自尊。公卿折節。徇虛論。晚知此道能亡國。何敢今時尙署門。齊穀自然辭暮市。魯戈曷久駐朝暉。平心檢點。盈虧事。草說當年八愷元。

道吉以古文崛起。爲同社所宗。而其弟道瑞。麟詩特蘊藉。過於其兄。貴池劉伯宗。城嘗曰。重瑞高逸。冲融比諸乃兄。亦猶惠連之與靈運。邵漆夫亦云。當時四海一子由。可以舉語。然道瑞豪邁自喜。意蓋不僅欲以詩文名。觀其擬古數章。可以知其志矣。一章云。客有萬里行。相逢下車揖。笑譚無俗姿。奄然長大息。拊髀爲予言。挾策詣燕北。上多媚嫉臣。下多縱橫賊。時沈眉生被徵二章云。每悲夙昔人。慷慨持所願。攬轡矢澄清。

枕戈以待旦。誰當長伏櫪。所志委秋蔓。功名曷足道。獨此民塗炭。其四章云。白日蔽江雲。憂來不可待。駕言清河涘。我馬亦已瘵。秋水澹芙蓉。美人阻中匯。仰見黃鶴飛。飛去尋江海。其六章云。乘鷺駟玉虬。呼吸三千丈。濯纓弱水中。倚劍若木上。何以調渴飢。瓊樹有瀝沆。攝氣得還元。冲漠游至廣。浦上徐道潔。濯云次第讀之。可以言騷。非虛論也。

道瑞五言。有小橋臨淺瀨。流水伴孤村。滄雲封半榻。移月怯孤峯。七言有唱徹漁歌深極浦。敲殘梵磬到前洲。濁酒掩關天下事。素書支屋古人心。並清遠有致。蓋老而閉門。無復少時之豪氣矣。

秀水高寓公。宰涇有惠澤。後其子佑鈺。

字念祖

來涇。桐城方爾止文。贈之以詩。兼呈萬道吉云。歲暮風雪寒。

高生來自越。假館青溪傍。棲遲未旬月。又欲泝大江。孤帆待明發。言過牛渚西。桃花潭始歇。先公昔爲宰。恩澤沁人骨。至今四賢祠。俎豆猶馨醇。君往拜其下。仰首瞻崇碣。父老皆來觀。進酒供殼核。新令苟賢者。

感動念存歿。分金潤行李。諒不忍輕忽。況君富才藻。逸氣凌溟渤。雅游在山水。匪直事干謁。舊交有萬叟。岩居采薇蕨。冒雪尋訪之。松窗燔楮。爲我寄相思。數年音問缺。按寓公當祀於涇。今入名宦。但涇無所謂四賢祠者。恐屬傳聞之誤。姑識於此。以俟知者。

張載述爲諸生時。以布衣而慨然有憂天下之志。嘗累上當事書。皆不果用。其叔張一雛贈之以詩云。陽九逾茲遘。時勢如鼎沸。皇天降檣槍。罹毒遍蒼赤。殺戮何慘淒。枕藉江以北。楚衛半陷吞。豫章行告急。警報下江南。旄倪竄山谷。當事豫征輸。閭閻罄膏血。吁嗟南豐者。苛政猛於賊。罔念帝室憂。日夜恣培尅。爪牙橫鄉隅。雞犬無寧息。吾子懷骯髒。仗劍走京邑。纏纏數千言。雷轟與電掣。三上司馬門。啓讀咸辟易。九闔萬里遙。誰爲達君側。空負洛陽才。痛哭亦奚益。浩嘆吐虹光。怒成奮鯨鬣。老夫臥山中。聞之髮髭立。歷覽古史傳。英雄幾埋沒。左車計若就。准陰胡由入。徐洪言若聽。李密胡由滅。成敗本之天。緣會有時合。矚子且藏鋒。囊錐自見末。子今復遨遊。令我肝腸裂。鸞鳳日以遠。狐狸肆妖孽。努力請纓去。復筭中行說。集蓼甘多難。持滿終虞缺。所以大任人。在險表奇節。書此布區區。臨書淚哽咽。春風來好音。慰我婆心切。載述後。間關入閩。爲給事中。以阻孫可望封被殺。

楊於陵奪情視師。宣城沈徵君

民壽

三上疏爭之。不報。乃拂衣歸。萬道吉爲之顏其所居。曰世爭奪情。沈家

蓋以沈之先殿撰君典先生。嘗爭張江陵奪情事也。鼎革後。徵君不復出山。余族伯谿叔公

崇禮

贈以詩云。

軒后山中日似年。自堪高枕與耕田。薜蘿猶是秦人服。苔蘚全封圯叟編。林聽杜鵑時下拜。海嗟精衛竟



難填。五松小隱還嫌淺。欲擬從君臥古烟。

五松水西禪院。谿叔公常寓處也。

谿叔公書法入二王室。四方以絹素請者無虛日。偶臨池自嘲云。垂白空操筆似椽。誰將珠瓊換雲烟。饒君縱得眉山價。也要遲留五百年。年年歲歲浪塗鴉。戶屢如雲鐵葉斜。莫笑鵝羊都寂寞。有時瓜蔔儘盈車。

沈徵君入金華山十餘年。溧陽相國陳名夏欲薦之。專使奉書。徵君不啓封而還之。先維生公有過沈氏山莊詩云。冥鴻不受慕。宛在水雲間。孤性嘗憐鶴。清光獨占山。道由澗曲盡。門爲燕泥關。昭夢此中足。青松未改顏。謂此事也。

萬道吉云。維生嗜碁。筆墨餘間。卽召其所。晤手談竟日。然先維生公口占云。破裘不耐寒。敗葉聊相補。閉戶敲殘枰。茫然忘舊譜。聊寓意於此耳。非嗜也。

谿叔公所居。名文燕齋。自負法書入於逸品。而不肯以詩名。一日施愚山司寇來訪。喜而有賦。得句云。窮巷應門無禪子。奉裾織翠過昌黎。施大咨賞以爲不減劍南。又好寫蘭。嘗亂作荆榛叢莽。而數莖迴出。見者謂有仙氣。自題其上云。道人偶寫棘中蘭。嫩慙無嫌信筆刪。曾讀龍門司馬史。老莊何礙合申韓。

胡相承世及有題蕉道人谿叔公別號畫蘭詩云。脫然生滅外。虛談自成陰。秋風莫敢折。立意一何深。坐臥於其

下。時見故人心。詩意亦清遠。可愛伯承爲休寧廣文之官日。谿叔公送之以詩云。清詠徧留黃白嶽。閒官徧愜墨茶鄉。林乾維柱爲之擊節。

林乾維。閩人。流寓於涇。善畫山水蘭竹。並楚楚有致。尤工畫石。谿叔公題詩云。林子青鞋四海終。雲烟長是伴孤鴻。秋來忽動關山思。五岳先移一室中。瘦骨曾餐浩劫烟。一坵蘿薜臥蕭然。點頭若問何年事。却在生公未說先。後林歸。送之以詩。有殘陽橫馬影。孤笈冷秋聲之句。林笑曰。子常謂子畫中有詩。若此。則真詩中有畫矣。

谿叔公善病。常閉門自攝。而不廢筆札。一日。胡伯承見過。見其倚牀支几。作如箕大字。而吟詠成帙。甚都有懷。乃嘆曰。如此病。故足貴。然不節。則真氣未免有動。因爲詩以箴曰。屏躬日病肺。對子病良已。清譚娛我心。新詩自爲體。取益在曹溪。神明日以起。秋氣來虐人。使子亦伏几。一月臥蕉齋。夢寐達知己。今茲候顏色。楚楚清骨峙。不嫌擾君靜。翻謂見我喜。銳氣帥精思。如以齊伐莒。嗟彼肉食者。無病安足擬。腸肥志不潔。逐逐如腥蟻。何當草元人。觸病養妙理。顯氣接混茫。悟中出真斐。竟讀攝我神。煩囂頓還裏。祕此可樂饑。湘蘭與沅芷。我願子且問。息慮率曠兕。自悔出腐餘。引子芬滿齒。相期冥諸道。元室虛可徙。漸近返自然。減知以益髓。勅斷文字禪。挹彼西江水。浩然從吾初。一爲了生死。良朋之愛。情餘於言矣。

侯晉水世賞音刻成。詩以紀盛。先維生公。次其韻和之云。山水由筆慧。樂結幽人盟。芳流泛餘波。各自抒

靈性。李杜倡雅先。汪許稱後勅。東山蒐百家。聲響如呼證。微言忽中絕。殘蠹橫如鏡。一筇誰相扶。墨雨洒循令。秀骨帶霞氛。絕代英華并。博搜徧林淵。珠璧有兼迸。方期古音嗣。漸覺今徽更。片字香青瑤。卿雲生氏姓。岩壑佩奇光。鶯花共誌慶。撫函扣絲竹。渺致逼唐盛。時屬和者甚衆。晉水惟首推是篇。以爲非老手

不辨。

查石門鑿宰於罈。有治聲。罈州有庭柏一株。海剛峯手植。先生賦之以志遺愛云。何年翠柏老庭中。手澤猶能記海公。自是鱗姿孤映日。更無霜幹共摩空。曉鐘月上流清影。古殿香來任好風。千載長垂堂下蔭。愛留應不異巴東。詩極沉雄可喜。又南歸別友絕句云。倦遊喜發向南舟。及到帆開却轉愁。南望鄉山北望友。情同潮水去來流。情致纏綿。不愧唐音矣。

翟伯誨尚忠與萬道瑞交最密。甲乙以後足不踰戶闕者十二年。偶聞道瑞在桃花渡口。乃一出見之。感而

賦云。半生痼疾是煙霞。不問迷津十載賒。偶爲杜陵懷舊雨。漫從剡曲踏晴沙。江邊魚鳥怪吾在。路上兒童識面差。己似秦人隔時世。獨憐無恙古桃花。意曲語深。覽者咸悲其志。

水西山桃花。自三寺邇迤至泉清坑。四五里之間。一望如赤城霞起。山之下有洲曰中洲。環洲皆水。居人又競以桃花植之。間以桑柳紅綠掩映。致爲可觀。鄭樵齋過。曾爲作記。施愚山自黃山歸。遂過水西。作桃花洲詩云。褰裳凌亂流。理策遵修渚。岩梅尙餘花。溪桃紅半吐。飛霞散平疇。錦浪生別浦。雜卉旣婢媛。危亭亦森舉。林壑見山寺。鳥喧作人語。昔來粉彥會。事往餘榛莽。流目覽衆妍。登高當孤嶼。撫物歡在茲。仙源復何許。旣乃訪家谿。叔公於文燕齋。出黃遊草見示。復偕遊水西。時桃花已落。復賦詩云。渡口漁人路不迷。重來綠樹一鶯啼。風光好處傷心甚。目送斜陽下水西。

梅瞿山。清朗三先生之族子也。偶來水西。見先維生公於欵閣。追述舊誼。爲作長松踞石圖。而題詩其上。

云最愛蒼然老松樹。歲寒偏放拂雲梢。芳菲肯逐青春侶。只許梅花作素交。今藏於家。

先維生公與梅朗三交最久。故梅瞿山清耦長庚皆來修子姪之禮。二公皆善畫松。時先伯作舟公諱濟尚

幼。追隨履齒。遂微得其妙。片楮尺紙。頗爲四方所珍。晚年倦於題識。常命子作畫松詩數十首。以待拂翰。

青陽吳七雲。襄有贈句云。蒼松浩浩挺千春。攻玉齋頭掛壁新。今日扣關見顏色。不知是松還是人。

吳七雲。襄常書世德流光之額。以贈先伯哲侯公。諱濟而作記曰。余昔受經於涇之桃潭數年。獲交其邑之

賢者。曰趙明經哲侯。趙固涇望族也。哲侯之尊翁鍾越文學。諱汝謹身立德。爲鄉里所尊敬。嘗以文廟之

崇聖祠。圯廢不治。毅然獨任修葺。具備。哲侯復承先緒。更新之。閎麗有加。余聞哲侯家居。孝友睦婣。任卹

諸美行。不勝紀。紀其大者。以其功在 聖門。且善繼先志也。邑之人嚮慕世德。上其事。得附祀學宮。嗚

呼。鄉先生沒。而祀於社。父若子。皆與焉。榮矣。哲侯子三。長曰預。以人才薦。宰於浙。次曰青藜。拔入太學。壬

子舉京闈第三。文品絕高。主司任少宰。香谷善知文。嘗語余曰。京兆之役。喜得此才。季子曰希文。嗜學。爲

名諸生。趙氏世積善。錫羨於後人。其代興不可量。而表揚懿美。固禮臣任焉。矧託在素交者。爰書世德。流

光之額。以懸其廷。七雲微時嘗 於翟村。與余老友翟非熊交最篤。故有主人多雅癖。好客。復好詩之句。

又有遊彩虹岡詩云。仰天呼太白。游後今無詩。有酒不能醉。江山空自奇。語意尤嶽崎磊落也。

閨秀鄭瑾娥。鄭汝敏之女。能詩。嫁葉氏。其病中贈夫句云。一行詩就幾回愁。持贈蕭郎仔細收。他日鴛鴦

雙舞處。羅幃可憶舊時儔。施愚山先生極稱之。瑾娥所著有女紅餘誌一編。其女伴有以荷花貯膽瓶中者。瑾娥索之不允。寄之以詩。兼問其病。有云。疇昔瓶中花。妙出君之手。儂心愛莫得。燈下迴玩久。細較人與花。花與人俱瘦。偶爾動余思。持此爲問候。花顏似舊無。君恙全愈否。語尤委婉動人。



# 涇川詩話卷中

鄭子漢林

相如

以不世之才。文壇主盟者三十餘年。著作等身。脫稿紙貴。間嘗於邑古跡。凡仕宦流寓。忠臣義士。幽人烈婦。取其可歌可詠者。稽之史冊。徵之碑記。編爲樂府。詮註詳晰。得若干篇。非信勿傳。有美與刺。潛德之銘。光旣彰。里巷之感。發尤切。厥功偉矣。余旣屬而和之。諸同人亦皆並有篇章。焯焯煌煌。登李西崖之堂。而濟楊廉夫之載。信巨觀也。今各取其佳者。著於此錄。而余之什亦於是附焉。亦庶幾借有韻之文章。備一邑之典故云。

漢林勇里。戰云赤帝祚將終。羣雄起角力。孫家獅兒誰爭鋒。來平江東討山賊。丹陽僞守立屯府。大爲山越附。山塢山城塢裏鳴金鼓。一戰擒之如縛虎。解卿縛捉卿手。不憶神亭時。曾分勝與負。卿得我。未可量。我署卿。賊曹上策馬。大咲歸中營。勇里蕭蕭風雲壯。

漢獻帝建安三年。太史慈據涇縣。孫策擊擒之於勇里。

桓嶺屯軍行云。典午趨將吼山頭。東南殺氣橫霜秋。誰表陳師糾義旅。鷹鷂逐雀聲啾啾。石碓轉戰軍不勝。退據廣德賊兵進。灑涕來屯涇谿東。憑險軍容震復震。大江以南無堅城。有客好謀僞請成。丈夫無寧歸視死。自誓肯與賊俱生。嶺頭一巒崎嶇路。傳道廷尉殉身處。年年谿上啞啞烏。只遶忠臣墓旁樹。

晉桓彝爲

宣城內史蘇峻反。舉起兵赴難。遂屯涇縣。峻將韓晃攻涇。裨將俞縱戰死。城陷。舉死之。

石鼓山歌云。東黃崑。西白馬。石鼓屹立兩山下。山中人居不聞聲。無聲誰爲鼓。擣者君不見。陳倉石鼓車。攻詩。周宣中興史。籀辭。西蜀震鼓四十里。茂先博識桐爲魚。有畫有聲人工爲。何似此山。此石天生形。如擊。馮唐豈愛水雲鄉。老去買宅山之旁。擊鼓召賓賓皇皇。山上無宮花滿樹。後主不畏北兵渡。擊鼓何爲狎客赴。傳說荒唐紀乘部。我信不信問石鼓。石鼓默默天不雨。青山綠水笑千古。

山在邑東。古傳馮唐居此。擊鼓集賓客。一云陳後主擊鼓

召賓客於比。

安吳嬰城謠云。賊臣仰射臺城江。南朝天子玉食空。風烟騰天天流虹。青絲白馬兒氣餒。何洵洵。宣州不服飛流矢。安吳城帶涇川水。內史嬰城抗其鋒。賊帥來攻賊旗靡。賊旗靡。馬上郎邀黃塵起。時移物換幾千年。渡口誰家村樹烟。守城遺壘成荒田。落星潭上蒼狗眠。劍氣猶壓藍山尖。

梁大寶初。宣城內史楊白華。不附侯景。進據安吳。景遣于子悅等帥

衆攻之。不克。

香心娘歌云。唐季起草竊。逆氛流宣歙。帆帆江淮衝。女子一腔血。寸鐵當前甘就飴。骨燬身灰心不滅。十里芬馥香如雪。同時長安僞妃嬪。果頭敗後俘金闕。九重怒責衣冠子。紅顏不伏詞喋喋。滿廷臣賊渾閑事。君王莫問奴失節。金魚朝官僵且啞。私怪彼婦何大黠。古今大義知者難。誰能獨伸天地間。置



身何等嗤人污。鬚眉巾幘兩無顏。君不見涇之水。香心娘。清氣吹不散。化作冰與霜。

梅氏五娘。洪勝可妻。黃巢賊兵逼梅。誓死不從。引刀

自刺死。心香數日不腐。邑人祠祀。號香心五娘。

胡彬仲

承

台泉雲龍歌云。台山高。台泉清。天地開闢山有靈。龍爲師。雲爲弟。講學深柳文星聚。文星聚處

三台光。列宿熒熒照廟廊。我來登山雲門開。書屋無人長莓苔。蹲踞怪石吼人來。雲龍隱現越觀臺。

明嘉靖間。

許文穆國讀書台泉山。一時從遊俱登巍科。爲列卿。時稱九進士。其齋讀處名雲龍書屋。

翟堯仙偃。猷州刺史歌云。錦帆殿。腳楊州樂。瓊花觀裏楊花落。太原公子楊裘來。羣雄次第塵氛廓。猷州

刺史亦英雄。早識天命欣所託。妖氛一旦徧東南。獨拒危城當鎖鑰。嗟爾小醜敢紛紛。轉戰丹楊鷓逐雀。

功成拂衣朝天去。英名好配褒與鄂。

隋大業末。左羅當據涇。六年降唐。授猷州刺史。七年輔公祐反。圍猷州。羅當嬰城自守。會李大亮兵至。合擊破之。

翟泉初涓。虞翻戍云。文臺眞英雄。伯符稱人子。可憐吳王權。亦是豚犬耳。不爲臣魏羞。却抱受諫恥。而使

虞翻至於此。

虞翻仕吳爲騎都尉。數犯顏諫。諍吳王不悅。坐徙丹陽涇縣。

遺民把釣吟云。五斗不折腰。一竿可避人。水西白雲灘。灘上劉遺民。柴桑一官何足云。掀天貴富如過塵。

贏得釣臺高入雲。

劉程之嘗爲柴桑令。後棄官釣魚於水西白雲灘上。

桃潭送客行云。願爲潭上雲。片片逐客舟。願爲潭中水。點點隨舟流。汪倫不作萬巨死。客不來兮我心憂。  
李白客涇縣。有桃花潭水深千尺。不及汪倫送我情之句。

廿一弟然乙琴高曲云。涇川城北棗溪峯。下有一洞開玲瓏。道是棗高脩煉處。丹成御鯉培天風。我來訪古心忡忡。茫茫墜緒堙虛空。秦皇漢武誤今古。至今海上謗瀛蓬。君不見琴溪之山茹可採。琴溪之水鮮可膾。籀龍爭地上干霄。秋月春花勝事在。會凌絕頂嘯雲天。瑣瑣何須問藥滓。  
琴高居涇北二十里山岩。修練道成。控鯉上昇。其所遺樂滓化小魚。

每歲上巳土人爭取之。

桓嶺屯軍行云。東漢聲鐘鼓。節義冠今古。漸滅茲氣盡。當塗禪典午。清談誤我士大夫。執鄙吝者其誰乎。天心不隨天運剝。內史桓公裨將俞。江東妖氛侵山城。內史力掃屯吾涇。命俞將軍山頭戍。於今山錫桓公名。嗚呼一木支大廈。降賊多識時務者。男兒死耳甘同心。滿腔劍血冬青下。將軍如水公如源。春酒社鼓來荒村。賊已褫魄浩氣存。連呼殺賊起陶溫。

桃花潭送客行云。桃花潭上花如焚。潭外斜飛一片雲。片雲飛起不肯下。悠悠誰是汪倫者。踏歌古岸人無語。獨泛扁舟送花雨。

水西講學謠云。涇水之西講堂開。一時學者轟如雷。入主出奴齊嘖嘖。揚波鼓浪姚江來。江之學金谿是。暗主禪宗排朱子。朱子早年亦入禪。特編定論清真似。世上誰識一塊金。改頭換面陽明祀。吁嗟乎。儒釋

之辨紛茫茫。調停解慣中。騎牆忍使異。學鳴荒唐。唐患同。洪水流汪洋。狂瀾手障百川東。紫陽千載人尊崇。如何一席談。經地苔痕草色生。淒風。

嘉靖間建陽明祠。講良知之學。錢德洪王畿更迭往來。學士荐紳。雲集。天啓初。邑人追祀朱子。改稱朱王二先生祠。今存其名而已。

台泉雲龍歌云。台山石骨森岩嶢。下澄活水涵波濤。幽人結宇山之椒。栽花種竹塵氛銷。獨立雲門雲飄颻。羣龍飛起攪海潮。便與陰雨生枯苗。我曾看龍龍飛高。杳不可攀天沓寥。籛龍冒雨抽新條。解衣穿雲風瀟瀟。夢殘午睡僧歸寮。出林清磬一聲遙。

多方怨云。四海分崩定於一。淨捲殘星開旭日。旭日初開光矐矐。不禁蜀犬無吠紅。創業之主大度多。漢高不下魯弦歌。我朝開基周家厚。旗分八陣詰羣寇。大兵直壓江東南。百姓有過宥之三。涇人亦念王師怒。敢幸新恩間舊故。明高皇帝養士深。獨無遺澤留人心。儒衣儒冠孔弟子。爲君爲父計生死。新天子開亦色喜。謂此遺黎應爾爾。尙其布告涇人士。與爾自新樂更始。盍歸乎來靜無譁。到今山水爛雲霞。四時佳興和風扇。優游不識多方怨。

國朝順治二年。涇人迎舊令尹民興據城抗。王師城破。民興遁。教諭周泗訓導劉守中諸生趙初浣趙大中張載達趙崇雅等殉難死。

余陽侯辭云。伏羲一畫開天下。陽侯精純如龍馬。同時六佐鬱廟謨。陽侯錫命掌江湖。陽侯死。死於水。靈不汨。水中起。滔天之怒不可拒。三江底定舜命禹。後來赤烏水過山。相傳祇剩三友屋。

邑有三友坊。云赤烏二年之水。僅存三人。

今大雨積潦時。往往波濤滿山谷。龍作臂。蛟作眸。魚鱗鱗。從君遊。村中伐鼓戴神頭。神不來兮我心憂。

伏

時有陵陽國路史陵陽山名在宣州涇縣封侯曰陽侯死于水爲水神所云陽侯之波是也論語摘輔象伏幾六佐陽侯主江湖

楚王怨云。離離山上苗。倏忽移澗底。昔蔭百尺條。今遶澗邊水。男兒幸出帝王家。天生茅土供豪奢。尋常不歸猶簞盞。胡爲遠徙天之涯。辭天闕兮道路賒。涉河洛兮歷淮沙。悲逐臣兮哀啼鴉。來至涇兮心如麻。君不見尺布縫斗粟。春泣煮豆思剪桐。五百戶湯沐窮山深。誰識楚王宮。蕭蕭白楊生悲風。

漢明帝永平十三年楚王英有

罪廢徙涇縣賜湯沐邑五百戶十四年英自殺詔以諸侯禮葬於涇

石鼓山歌云。黃堯之西白馬東。一盤石鼓懸當中。團團如鏡鬱清空。灣灣如月孕琳宮。周王用以刊車攻。刀鎚不受廢芟礪。何年白鶴羈樊籠。茂先休伐蜀山桐。我訪野說旋不同。譬諸小兒談鴻蒙。或曰馮唐老龍鍾。閒時擊鼓招賓從。或曰後主宴臣工。後庭花裏烤冬冬。茫茫千載無問處。慘淡茲山自今古。我來徜徉山之傍。獨對空山擊石鼓。

桃潭送客行云。謫仙人在雲中走。一兩句詩天邊有。誰向雲天推落來。汪倫十年藏美酒。請君來。花爲君開三百里。涇川尋源直到碧山崖。俠骨香酒一盃。無情桃片紛如雨。引君來。又引君去。踏歌聲。何時已。君行抱月還太虛。揮手一別千古矣。

六印加劍行云。觀文炳蔚開天曉。奎野五星光皎皎。山中半夜讀書人。挑斷寒燈春夢巧。龍泉影逼斗牛寒。六印纍纍加劍鐔。依稀記得神人意。幾回珍重索公擔。我聞文正薦十相。太宗御筆書屏上。只因鎖鑰

重劍門。十人八入公。且放巍巍劍閣六度登。節鉞西南君股肱。蜀人少壯與公習。詠歌沐浴思遺想。嗚呼。人生骨相由天造。黃閣未登身已老。驀然記得夢中時。六印加劍公笑倒。

宋工部侍郎凌策。少夢人以六印加劍上遺之。後治蜀凡六任。王旦病荐十人

代。惟策與李及未相。然亦皆爲名臣。

森翠樓云。我所思兮琴溪山。山中人兮揮朱絃。蒼崖剝落苔鮮斑。樹籠溪兮竹罩園。長橋逶迤宣州路。野陰無人太守渡。太守驅馳家國艱。山中閉戶朝猶寤。指點森翠半沉吟。森翠中間定有人。此中其有人號真隱。亭亭不染世間塵。吁嗟乎。士各有志不可強。揮筆題樓情快快。成仁取義從此往。山中人兮人不知。

樓森森兮翠蕩蕩。

淳祐間。程炎子隱琴高臺。文信國守宣州。引車過炎子。名其樓曰森翠。

建康副使調云。愛莫知其惡。漸染由來久。一旦太阿授。天下看一手。巍巍乾綱政府收。凜凜冰山堅且厚。御史側目飛霜毫。擬將白簡褫其袍。當時不聞天子詔。微解平章笑裏刀。笑裏刀。機莫測。南臺且向南中謫。向陽不改心似葵。觸奸終見面如鐵。平章大笑封刀來。建康取得首級回。忠臣血濺長江水。夜夜波濤鳴不已。

元臺史洪文廣刻平章桑哥擅權怙寵。謫建康。廉訪副使又三上書言朝廷得失。桑哥矯詔命賽首京師。

輟講彈云。朱明烈烈烝書幌。揮汗談經情鞅掌。侍臣簇擁聖躬勞。暫請輟講亦非罔。諤諤小臣執簡爭。輟

講或恐經筵停。直彈元老存姑息。彈者不怒傍人驚。我聞董公凜風節。坐鎮江西嘗鎖壁。後來寧逆毒殺公。遂令章江浪染血。此事江志言之詳。國史家乘兩磨滅。願以詩歌補殘缺。

明董傑進士觀政時上疏論經筵。暑月輟講事。與蒙宰王恕異。回鄒智湯

之被誣。忌者陷以朋黨。并刻傑陷。無幾不測。仍賴王公申救獲免。

嚼齒嘆云。闖賊之禍。縱獻賊之禍。橫者上傾天。橫者下賊民。東南徧獻跡。西蜀無完城。積尸蛾眉巔。流血錦水濱。紫陽朱公誓守土。登城嚼齒肯首鼠。守死城子死。父妻死。夫奴死。主闔門死。節何其苦。君何苦。

勁節義聲邁千古。朱儀為嘉定知州。張獻忠陷蜀。城破不屈。闔門遇害。

漢林既倡為涇樂府。而同人又相與廣其題。為懷古七絕。互相屬和。今摘其尤佳者於此。然乙陳焦墓云。七日重生事已誣。如何得位應孫吳。漢家赤帝秦家白。誤盡名流是讖圖。

晉書吳永安四年。安吳陳焦死。七日復生。穿墓而出。此烏程侯皓承廢故之家

得位之詳也。

秋霜開云。冬月繁花夏月涼。芝蘭臭味鮑魚香。高人不作時宜想。落紙雲烟筆有霜。

李白詩。五月思貂裘。為言秋霜落。宋揚傑句云。謫仙

詩為傷時作。

義門云。層霄詔下事非誇。不數田門一樹花。五世傳來幾昆弟。婦言勿聽報官家。

唐太和六年。觀蔡使沈傳師奏涇縣

萬晏五代同。儒門殉節云。東山砲落泮池焚。弟子先生死報恩。漫道廣文官舍冷。幾多熱血濺馨門。

乙酉之役。涇教諭周

酒調導劉守中諸生趙大中  
趙初浣等數十人皆死之。  
馬頭磯云。泉飛石立落淨瀑。碎洗苔痕竹淚斑。此地不投文弔屈。孝陵遙望紫金

山。  
鼎革初。徵金聲。俘至馬頭。門人江天乙勸之曰。一泓清水可愛。聲大。聲作色曰。大丈夫死當令天下見之。

兄子一誠。神仙石云。一拳怪石碧蘿傍。曾說神仙到睡鄉。日暮行人誰駐足。勞勞車馬往來忙。  
神仙石在縣北十里。上有

仙人坐  
臥跡。

周蒼泉虬水西鐘云。水西鐘打暗黃昏。十八聲敲咽復吞。道是黃泉多黑路。為憑一擊照歸魂。  
水西鐘。舊傳異人所鑄。俗

有喪者。倚僧擊之。言亡者聞鐘路明也。僧人撞鐘。以十八為節。

鄭漢林黃沙嶺云。一片黃沙萬仞巔。蒼崖古木舊山川。隋唐往跡今何在。落落荒村起暮煙。高空瑟瑟斷

雲低。鏤盡青巒碧水溪。此日臨風懷往事。樵夫指點夕陽西。當年用武古猷州。破賊黃沙骨滿邱。千載遊

人尋舊壘。青山無語水東流。  
唐武德間。輔公廝反。舒州總管張鎮周擊公廝將陳當世於黃沙嶺。大破之。 夫人尖云。丹崖翠巘勢重重。為問夫人占幾

峯。烈魄不隨陵谷變。一輪明月照青松。  
峯以香心。夫人得名。 宗婆塔云。煙雨亭邊景物多。鳥啼花落水橫拖。祇今古塔

荒煙鎖。無復宗婆帶雨過。  
舊志謂水西塔歲久若新。蓋宗婆風雨時常來洗之。

吳子峻嶺赤烏水云。赤烏二載水稽天。鑿石誰人記歲年。我向湖山山頂望。蒼蒼煙雨暮相連。  
湖山石壁。舊傳有篆刻赤

烏二年水  
至此七字

十弟景杜預花井云。投花當日亦尋常。花井名留萬古香。往事於今寧可問。居人萬戶酌清涼。

花井近城西。相傳郭璞投

花其中。

故名。

翟泉初涓釣隱亭云。曾傳仙客垂綸處。卜築何年占一灣。却怪嚴陵成底事。猶留名姓在人間。

亭在水東。

落馬

潭云。矢亡弦絕事何成。將軍落馬士吞聲。潭光染得忠臣血。一洗腥風萬古清。

桓彝落馬於此故名。

余蘭石云。不欺主將負朝廷。配食桓公國有經。蘭石荒涼三尺塚。阿誰覓得晉人銘。

晉桓彝裨將。俞縱守蘭石。戰死其地。

長史

宅云。道傍德政歎如林。峴首山前淚獨淋。果使作官遺愛在。豈能為盜便無心。

唐長史李孝儻。歿後家於涇。廣德間盜起。羣盜戒不入其室。

落

星潭云。踏歌聲裏復舟停。欲向巔崖小結亭。豈是謫仙擔月去。夜來留得一潭星。

唐李白云。涇溪藍山下有落星潭。可以卜築。有寄何昌浩

詩。雲中字云。書河書洛幾人傳。識得無人亦枉然。好借承流峯頂力。畫成奇字上青天。

明萬歷二十七年。涇縣雲中見。隋疲貧蜀四字。

李贊樵書載此。又邑中有山名承流峯。形尖如筆。因謂之文筆峯。

閱邊圖云。九邊誰倚作長城。萬國呼來拜上卿。節鉞如林看不見。依稀壇上是

書生。

明蕭彥以戶科給事中奉命閱邊。檄外繪圖藏於家。

新城血云。血染孤城事莫非。



新朝猶與表幽微。但將此志留天地。正氣銷成金帶圍。明崇禎十三年。涇城新葺有赤血塗城。屢乙酉之役。生員趙初浚等據城拒守。都督張天祿攻破之。初浚等皆死。今欽定明史備

載其事。香烟結云。城烏夜夜泣殘痕。忍毒涇民爾獨存。歸作孟蘭投五體。香烟結裏認忠魂。初涇人謀拒守。生員趙大中等率舊

令尹民與主兵城將破。民興遁。後奉佛追殲國虜于香烟中見死事趙大中坐於上。汗流浹背。民興亦以浮屠終焉。

廿二弟雲翔五郎廟云。肅肅靈旗夜有光。英風不讓左難當。如何青史羣雄傳。遺却當年石五郎。隋末石五郎佐汪華

殺賊有功。居民爲立廟勇溪口。魯家坪云。義膽忠肝不可誣。先生意豈在孫吳。峨冠偉貌如生日。入夢猶稱漢大夫。昔有人於此築地得

古墳。夜夢偉丈夫來曰。漢大夫魯肅也。因名魯家坪。紫桃洞云。曾記當年射虎來。於今古洞晝然開。仙源不遠難重到。惆悵雲封洞口隈。

響山有獵者逐鹿。因得一洞。鄉漢林名以紫桃。余以多病不能遊。故云。甄塘云。盈盈一水隔城闌。南國何緣賦感甄。可有凌波仙女到。月明羅襪步

無塵。甄塘在城小東門外。相傳甄后生此。似未足信。萬村渡口。趁輕風。千尺桃潭水自東。但有汪倫皆可住。何須更問主人

翁。萬羣常爭此渡。萬曰吾家古渡。羣舉李白詩曰千尺乃萬寸。非萬村也。萬不勝末二句。一云萬互汪倫皆可住。何須爭作主人翁。丁王廟云。大仙姑又小仙姑。洪尙書與馬尙書。荒

村社鼓神祠在。華表歸來鶴有無。廟在丁溪。祀丁令威。但涇何以祀令威。令威何以稱王。又俚俗相傳。令威有二女曰大仙姑小仙姑。有二婿曰洪尙書馬尙書。語多不經。

竹枝小詩最難得音節入古風味移人使人咏其詩如歷其地余有燕市竹枝南昌竹枝而於本邑闕如亦未了事也然名流雅詠往往不乏姑撮其佳者於此鄭漢林云琴溪橋畔季春初茅店人臨綠水居日暮兒童忙擘笋呼娘和煮藥渣魚西門溪水碧如油湧石驅沙帶箭流落日平灘鷗鷺宿高桅鱗集買

糧舟涇山水最急

年來灣沚買糧多剗子關梢載幾何只怕家鄉連日霽灘乾難上幕山河涇舟小曰剗子稍大曰關梢山河水淺故舟祇

宜小者

蕪湖鎖巷泊羅匡客上長街貨未裝聞道家山溪漲發急尋水手打新擘船大者曰羅匡趁水大可行遇灘不能獨上必衆船協力名曰打擘

葉存叔居仁云糊邊削骨墨油濃纖手爭穿五色絨製得雲葩千百柄連檣裝賣趁江風涇善製雨傘

周蒼泉云琴溪竹筍味偏宜正是藥渣魚上時小樣圖書書往蹟兩函相送慰相思土人多以筍及琴魚爲禮桑葉含芽

尙未齊綿包蠶子細如糲憐渠春喚蠕蠕出惱殺佳人五夜雞蠶眠已起替蠶忙小婦梳頭大婦桑最是

老姑侵早起喃喃催逼炊黃梁纜車初掉客南來碧色銀絲雪樣堆猶勝湖州清水線俗謂絲爲線土宜水色

逞風裁涇俗宜蠶絲而美西門正向大河邊對面桃花弄曉烟落日灘頭多欸乃篙師爭上賣糧船涇水多險灘不易上麥畦蔬

圃上坊洲竹樹桑麻浮復浮衣飯貧家千百畝山居空數橘千頭居民以種地爲利

鄭侶仲文熊云落星潭下水瀦洄小艇紛紛走馬來開遍護窠還灑網雪花撈起是金鮎落星潭有魚名雪花金鮎土人疊石以障

魚路曰

護窠

鄭雲皐應鶴云。溪邊浣女暮秋天。砧杵聲聲響晚烟。瞥見行人斜理鬢。回頭低喚小姑前。三家村裏讀書

堂。聽得書聲氣也揚。田舍多收三斛麥。不教兒輩斷書香。

又族人羽仲廷輝感坑詩云。山裏人家底事忙。紛紛運石壘新墻。沿溪紙碓無停息。一片春聲撼夕陽。涇人

多以紙爲生。胡凌九放舟赤灘詩云。青篁彌望蔽山邱。千尺深沈瀉綠油。小艇一蒿無處着。自隨洄洑下中流。

曲如鈎轉直如弦。急箭危流送客船。却下灘門望山色。遙遙眉黛倚長天。周蒼泉桃潭送客詩云。桃花潭水碧如油。蕩漾輕風箭似流。干樹垂楊縈兩岸。也難絆住木蘭舟。皆深得竹枝之意。

涇水患爲害最大。老河舊經水西山過。今移嶺城脚。百數十年矣。每遇淫潦。民有其魚之恐。康熙間。當事者欲復其故道。役民開河。此誠一勞永逸之計。水西僧元理作改河竹枝詞十首。頗佳。有云。亂礫層層莫漫愁。五丁曾易索金牛。會須俯看雙丸浴。三寺旋生波底樓。碧灣將變酒家村。艸屋重招白也魂。昨夜夢中聞欸乃。舳艫幾隻到山門。柿樹灘頭爭灑網。遺民臺上重垂綸。準期滾滾桃花水。沙尾沙頭日數巡。蓋深喜之之詞。然河竟不果成。

康熙戊子五月。大水入城。七月復大水。百姓困弊。胡凌九作詩傷之云。歲運遘百六。天意厭行仁。遙雨奔濁流。溪壑蕩無垠。潛蛟方竊發。洪濤傾城闈。塵市遊魚蝦。稻梁雜蘩蕕。耕稼豈不勞。萬寶空沉淪。吁嗟逃溺民。脫命惟一身。有如覆巢鳥。踟躕栖荆榛。千錢易斗粟。由何忍朝昏。草根與木葉。吞嚼徒酸辛。強延旦

夕命終與死爲隣。縱得來年熟。不救今年貧。我欲叫閻闔。坐迴天地春。斧柯不在手。此情孰爲陳。誰者司民牧。談笑對吟呻。慷慨激昂。其諸少陵之詩史與。

五十七年戊戌。復大水。居民湮沒。水西紀村。罹害尤酷。有馬氏者。人屋蕩然無存。翌日水退。皆遇救得生。無一失者。亦異事也。釋元理有紀事詩云。水西桃花洲。茅簷六十戶。而無一以存。人人皆上樹。號呼官船來。懸絲命何護。馬氏罹其殃。人屋東流付。三日各生還。一家駭相顧。人耶是鬼耶。團圞大驚怖。

元理號覺文。喜與請文士相接。吟詠無虛日。一日睡起。口占一絕云。睡起松風理舊編。此心未老雪盈巔。閑吟花月三千首。虛費工夫四十年。自是絕口不復作詩。

# 逕川詩話卷下

王荆公始爲集句。夢溪筆談亟稱之。余不揣鄙陋。集昌谷詩爲三十律。割截補綴。不足觀也。而蒼泉周子獨好而爲之序。其詞則幾於奴僕命騷矣。序曰。自錦囊句杳。難工倣詭之章。昌谷風遙。誰識離奇之作。掣鯨魚於碧海。浪擲波吞。綴翡翠於蘭苕。花迎柳笑。天吳紫鳳。疊顛倒以成奇。牛鬼蛇神。鑱怪靈而取異。鞭箠樂府。沈約無顏。奴僕騷經。靈均失步。若夫長謠短句。綽有鴻篇。至於五音七言。曾無近體。齟牙佞曲。固如談青子而回甜。流麗溫柔。何若舐崖霜而卽味。要必集分絨而製錦。聯斷壁而成圓。句摘章調。叶宮商之雅響。鯨鏗春麗。敷對偶之精工。始爲藝苑奇觀。方作詞壇創格。然而玉樓赴召。嘔來心血無多。白晝投閑。老去詩魂頽失。粉蠹僅遺四卷。綠章未滿千篇。倘骨換形移。寧免拘牽之病。而桃僵李代。寧無捍格之情。故騷客難于伸牋。哲人因之束手。乃有浚儀俊士。天水王孫。吐白鳳於胸中。振春華於筆底。深情似水。濯塵垢於滄浪。逸氣如蘭。探芬芳於幽谷。年年宋玉。祇許悲秋。歲歲江卽。偏工賦恨。擗筌篹之小引。筵上高秋。哭遼海之寒濤。簾間曉月。是以夢奉禮於孤衾。接隴西以素紙。徵奇集異。直如自立鑪錘。剔嶮抽艱。幾若別成機軸。律分三十。偏多喑嘯之詞。情有萬千。大作淒涼之調。爾乃銅仙辭漢。鉛水如波。玉虎牽絲。迴腸似轉。青天易老。魯陽戈下難回。碧海無情。精衛填來不滿。芙蓉宮畔。曾多失意之人。鷓鴣觀頭。盡是

埋香之侶。奏清商于別殿。淚掩長蛾。發素月於長廊。愁添隻鳳。爾其綠波點黛。泛桂棹於蒼梧。芳草含烟。駕青驄於紫陌。寄嶺頭之寒蕊。五夜懷人。折灞口之長條。三春贈遠。至若井陘道塞。易水歌殘。寒風多蕭瑟之聲。壯士有難還之候。白冠寄慨。望燕闕以含悲。古鐵無銘。葬秦庭而抱忿。心寒髮指。曠代如生。背裂目張。千年有色。若其漢宮漏永。堪憐圖畫難售。魏闕春闌。過悼蒲塘晚寫。撥琵琶而成別怨。淚灑炎塵。示衾枕而寄餘思。情消黑夜。及其欲賦玉環。而遣悶。實託飛燕以傳聲。同禍水之爭流。前車不遠。類龍蔡之煽豔。取鑒非遙。驪岫湯邊。會有高軒送至。曲江花下。曾經細馬駛來。金雞夜障。異相難禳。鐵馬宵鳴。妖星乍燄。嗟蛾眉之不保。嘆鸞鬢之何存。骨葬寒郊。夜夜梨花冷去。香消古驛。年年麥飯澆殘。閣道淒涼。山青水綠。雲幘寂寞。花落烏啼。似此不一之情。分題掇拾。難回之恨。逐句蒐羅。頓成意外之安排。盡易前人之面目。然而空外傳聲。幻中寄想。移宮變徵。難泥疇昔之陳言。會意象形。當賴靈臺之別解。僕半生溘落。早歲牢騷。紙上賤愁。不解河魚之腹疾。豪端寫怨。難回窮鳥之寒號。毋成短曲而舒懷。常綴長歌以嘗笑。乃同君結好。金石難渝。借子言歡。始終不變。香爐茗碗。曾於雨後啼鶯。酒社詩壇。共向溪邊盟鷺。集雄詞以見示。呵壁問天。合奇句以相投。縛船罵鬼。算來千年少並。羨君無乃仙乎。對此百感交生。笑我實非達者。蒼泉名虬。一字滄潛。工詩善窮。竟不偶以死。余哭之。有句云。屈子才華千古淚。賈生事業一生心。手揮萬貫甘貧死。山水於今遺好音。所著有藥亭詩草。

翟非熊賜履。精拳勇。善草書。所著清閣詩草。余同門友魯亮儕裕<sub>之</sub>序之曰。非熊氣高志傲。負兼人力。所日

夕華華者萬人敵耳。向使非熊而早遇於時。率千壯士橫行於烏斯青海間。梨庭繫頸之績可奏也。夫何至衣食奔走。白其首不得一逞。日啾啾焉。伴候蟲一吟而於牖下終也。因憶余少壯時。與非熊亮儕等同集於秦淮水閣。非熊於酒間自矜其技。而亮儕忽曰。子殆無用人也。同輩驚問之。亮儕曰。非熊工詩古文而不能時文。精草書而不能小楷。善步戰而不能馬戰。豈非無用人耶。時非熊方飲。不覺杯落於席。明日。葛聞橋亮來聞之。賦一詩以解嘲云。學書學劍兩無成。潦倒儒生氣未馴。太息脾間新有肉。於今海宇淨無塵。後非熊有寄亮儕詩云。思極不知云。難忘最我勤。亦謂此也。今讀此序。殆亦自悔其失言耶。非熊又有江上寄亮儕詩云。節換驚幽怨。離羣獨念兄。年華何處詠。木葉不同聲。迢遞書難寄。相將遠道行。南中多異路。未問草堂名。格律高古。在王孟之間。非熊五言。如木葉洞庭下。芙蓉秋水清。霜清十月籟。烟薄萬家樓。帆轉隨紅葉。灘回走白沙。家貧如病葉。人老似秋天。空林孤宿鳥。冷月浸危樓。疎夢空階破。深裏幽草分。語尤雋永。

葉存叔幼有天才之目。嘗讀諸葛忠武侯集。感而賦詩。人競美其三四奇警。余尤推賞結一語。以爲可以直追工部。衆或不然。然自當有知之者。詩曰。赤伏灰寒不可支。鞠躬盡瘁更奚辭。老臣劍外崎嶇日。孺子宮中醉夢時。蜀婦至今猶縞髻。晉宣終古不鬚眉。蒼茫天地心何似。月冷霜飛誦出師。

存叔天懷磊落。敏異絕人。嘗有句云。讀書自許眼光孤。識者知其不爲白譽。又大雪和坡老韻有云。窗前壓折幾枝纖。靜夜聲聲刁斗嚴。新竹支離酣阮籍。老松刻畫醜無鹽。螟蝗入土空成蟄。雕鷲雖寒不傍簷。

自笑狂夫狂不了。攜壺欲上玉山尖。尤可想見其慷慨激昂。不同凡俗之致也。

存叔五言。如每逢溪一曲。不盡綠千重。潮聲京口渡。春色秣陵關。七言如掠眼浪掀千頃白。迎人山吐數螺青。遠道惜歸霜人鬢。寒更起舞月隨人。雄健清新。並臻其妙。

霍及三思。讀書幕山。余同宛陵張鼎若士訪之。相逢一笑。遂成莫逆。余有句云。開門客到處。深柳鶯啼時。

花落青苔徑。人吟白雪詩。蓋紀其時與事也。鼎若亦能詩。後有寄懷及三詩云。時憶讀書處。青峯瞰碧溪。香臺孤磬發。夏木亂鶯啼。攤卷雲陰淨。敲吟月色低。幕山山下路。夢到不曾迷。亦謂此耳。

及三歲暮將歸。過余書屋。值天雪留宿。同人集飲。賦寒天留遠客之詩。以贈其行。余得留字云。如此寒天色。行行且復留。朔風吹遠客。別意惹三秋。細味尊中蠟。應憐江上鷗。他鄉能有酒。莫管驢驕裘。及三酬詩得寒字云。歲暮歸心迫。真成握手難。已同十日飲。更永一朝歡。馬繫霜蹄蹴。轄投露井寒。其如遊子意。雨雪路漫漫。

及三五言。如日月愁中度。山川夢裏過。硯墨和冰洗。爐香宿火然。七言如客中自是依人苦。世上誰如行路難。拙似我應貧到老。才如君笑老還貧。性拙原知高臥是。途窮始悔遠遊非。鏡裏新霜雙鬢滿。門前舊雨一官疎。深得中晚之意。

周蒼泉有贈別霍及三詩四絕甚佳。今錄於此。纔喜新知忽路歧。殘燈相對正堪悲。峯頭落日聯吟處。無限風流屬阿誰。正值秋風落葉天。斷腸人望別離船。西窗竹雨高吟夕。休忘禪燈對榻眠。文章冰雪憐君。



靜骨貌蕭疎。愛我狂今日。禪關分袂後。相思兩地可同腸。爲別華陽陶隱君。翠微深處把奇文。他年嶺上留佳話。猶鎖松窗數段雲。

蒼泉以拔俗之才。蓋世之氣。困於繩尺。不青一衿。而好客縱酒。以詩自豪。極困窮而不悔。嘗元旦獨酌。賦詩自嘲。激昂慷慨。余次其韻。有云。總是窮途休便哭。任他長恨不須歌。又云。春風曾不厭寒庭。并與先生兩眼青。蓋所以解之慰之。懼其以此竟天其天年也。余宦情久淡。兼以高堂白髮。自貴溪遷晉州。意不樂赴。友人胡凌九作詩相規。余感其意。爲錄於此。詩曰。平生勵名義。所要非臚仕。長揖謝公卿。肯爲五斗米。鳳翽失高梧。乃在荆之枳。江湖二十年。崎嶇未云已。循資稍一遷。惜此天下士。頗聞自南來。攀轅啼赤子。素心終不渝。澄江濯寒水。明鏡無倦輝。牛刀有長技。勉旃良吏心。側耳新政美。勿謂宦不達。堂堂州刺史。勿謂年已邁。五十服官始。行矣卓魯勳。三公將屈指。凌九五言。如風高秋日。瘦雲重暮天。低遠烟衝日出。空翠拂天來。七言如坐久星河搖病眼。夜深風露濕霜髯。路入蕉心千轉上。水流劍脊兩崖分。過大鰲山山逼狼心烽火近。渠通鶴口水源清。肅州道上江南岸。繞山當檻。淮浦雲低樹接天。平山堂壯麗雄渾。真得盛唐氣韻。又

拜郭林宗墓云。碑自中郎傳絕筆。人惟元禮是知音。用事尤爲細切。

凌九涼州道上得句云。迸火出奔蹄。自謂非履其地。不知其妙。

詩人多窮。古言之矣。而吾涇尤甚。且以地居山僻。名不出於閭巷。而加以志高性傲。無名公巨卿爲之揚譽。有沒沒終世焉耳。廿一弟然乙。用陶貧士韻。作邑中七貧士詩。以志其慨。其所咏自漢林外。皆未能免。

於此。余故全錄之。庶幾後有知者。詩曰。經生從古貴。一朝失所依。困龍噴瀨笑。螢火爭落暉。鸞皇鑿羽翮。不及蓬蒿飛。茫茫海宇闊。骨傲無從歸。劉伶日沉飲。陶潛時苦飢。攤書哭宿草。鄭子動余悲。鄭應辰字天樞士何

辭窮餓。周子本華軒。落拓鄙守虜。嗜好追梁園。雄文高壁壘。俠氣生雲烟。倚馬萬言賦。專家費極研。骨相

長撼軻。縱酒日放言。豈惟今之傑。抑亦古所賢。周虬字晉潛昔我同門友。並坐鼓瑤琴。相娛無俗調。相嘆無知

音。古樂人不愛。顏樂誰共尋。仰瞻箕與斗。無簸亦無斟。翛然行吾介。不以易所欽。一別成永訣。至今難爲

心。姪鍾峻字崧及驥偏服監車。珠不得離婁。零落南亭子。有唱莫與酬。覃精注蟲魚。鼎篆窮夏周。材大萬牛重。道

困八口憂。儲何須擔石。伏生老同儔。知君抱獨契。歸我肆冥求。鄭漢林諱相如別號南亭仲方今老矣。與世曾無干。坐擁

千卷書。如專百城官。壯心灰未盡。白髮強加餐。加餐兼進酒。從春至歲寒。身困得道亨。心泰任凋顏。龍鍾

同我病。風雨倍相關。再叔汝渠字仲方宅三眞俊秀。而乃困蒿蓬。才自緣勞益。文固以窮工。漢皇嫌賈少。渤海任老

龔。不作時賢想。長與古人同。彭令非諧俗。致酒先龐通。遇合本偶爾。一起雲風從。弟廷俊字宅三我固龍鍾甚。未

得乞一州。希天才傲儻。而豈泉石儔。氣成輕一擲。心仙納九流。少飲得趣味。間奕忘喜憂。曲高和者寡。有

美世亦酬。公孫起布衣。龜勉追前修。姪三希字希天別號心仙

辛酉之秋。廿一復典浙試。聞命恭紀。有句云。老馬知前路。重來尙故吾。蔣恆軒極推其簡勁。

余爲館陶時。館陶紳士延一高手畫士。圖館陶故蹟十二事。爲屏以贈。雖略倣周防士女之意。惜氣韻不高。落畫家窠臼耳。廿乙見而愛之。每幅爲賦一詩。不拘古律。其段干木踰垣一首最佳。王前之風其杏矣。士立談取卿相耳。進必以禮退以義。賢人守此介不易。矯而甚焉。其段干門到賢侯獨踰垣。毋乃率民入無用。孰決而起支坤乾。是時功利之害深。非此瞑眩淫人心。羌來畫墨揮淋淋。高風勁節清瑤琴。更欲移作明王箴。深得古樂府之意。

雨夜督小兒聖習詩經。正喃喃間。諸弟見過。各投以詩。廿乙句云。弟兄句夢三春艸。父子經傳一盞燈。衆共推爲雅切。

廿乙又有答廿二句云。懷新小草爲誰綠。得意閑花不著名。漢林極賞此二句。

四弟雲翔

雲翔與余同祖行四同會祖行廿二

省余於奉新官署。眷戀庭闈。告歸旋里。留詩四章。言情最爲楚楚。詩云。寄樓拜

別反江東。幾載相思道路窮。千里信音驚曉夢。一衾唱和愛清風。均沾雨露歌明主。獨向溪山嘯老翁。此去非徒憐病骨。還愁白髮望庭中。半年聚處慰離情。兩地牽連又反旌。餐飯頻加酬劇邑。精神留取赴前程。看雲臥日遙憐弟。視膳趨庭應代兄。把酒莫垂兒女涕。由來大孝是揚名。寒江颯颯拂貂裘。爲憶親闈泛客舟。一子趨承三白髮。七年來往四清秋。月明鈴閣瑤琴寂。霜滿牙檣玉笛幽。何日對床尋舊約。愴懷風雨兩悠悠。終軍壯志已蹉跎。宦況元方近若何。衛渚五年鴻雁集。新吳七載鳳麟多。綸音指日趨金殿。槐閣迎風待玉珂。莫謂祿微輕職守。邁征重與矢高歌。

廿二五言。如高歌明月夜。孤艇異鄉春。市烟人語亂。漁火笛聲歸。葉希千樹瘦。雲去一峯孤。七言如老去。每愁冬節近。貧來自覺故人稀。愁聽雁叫西風急。起舞雞聲夜雨多。砧聲向月千家杵。雁影衝雲一字飛。並饒風格。

中秋夜。鄭漢林葉千里弟雲翔姪希天見過。同拈鏡中桂題。限韻賦詩。雲翔詩先成。異香浮動碧霄空。移向秦宮似月宮。連理有枝交水上。霓裳無曲度雲中。欲攀蟾窟天疑近。笑折仙花路轉窮。莫對鸞光更惆悵。一年開謝豈人工。衆皆賞其工妙。有爲之閣筆者。沈補羅鳳江陰人。精鑒別。善書畫。乾隆甲子。來攝涇篆。出蘭亭三友圖索題。三友者。補羅暨金壇王虛舟。新建裘魯青而三也。圖作於補羅之族兄松年。在雍正時。今已數十年。裘王皆卽世矣。補羅每一展卷。必泫然太息。余感其意。爲作短章。以附卷末。并贈其行。其詩曰。補羅令於涇。大似雍邱米。書畫滿船來。文石盈袖裏。余本下邑民。謬爲補羅喜。高情竊遠雲。妙論濯塵滓。往者遊京師。走訊虛舟子。虛舟官黃門。乃抱相門恥。短章攄夙抱。一官如敝屣。昔嘗愛其文。問字兼載紙。虛舟曰不然。未蓬補羅耳。嗣又遊西江。數數裘氏里。樓閣連城陰。奕葉誇金紫。誰能拔清流。魯青屈一指。我欲訪其人。道云官裏死。太息伊人亡。蕭條空洪水。躑躅五十年。未遇天下士。晚乃倦於遊。還山逐蓬藋。誰知泥憶雲。歸求道在邇。令君逢補羅。望塵霍然起。鮒豈涸於泥。鸞乃栖乎枳。粹然抱大化。偶亦遊小技。因憶虛舟言。回首嘆爾爾。欣慕與執鞭。屈指爲進履。因得窺瑤函。備見三友美。補羅時年少。王裘與肩比。域中鼎足懸。海外神山峙。開圖露精英。雙淚落紈綺。茫茫四海中。悄然悲知己。吁嗟補羅翁。五十

而筮仕轉旋陵陽間。三仕還三已。何戀畚中魚。況此槐安螳。櫻筍及鱒魚。海鄉饒清旨。補蘿作柳村漁樂圖。以

於上有句云。來年四月。歲

拂袖歸去來。無重吾腰累。臨別獻巴人。譬之河東豕。歷歷書所遭。下士笑於哆。余性

不耐蠅書。以草法書一卷報之。補蘿得之大喜。乃自以小楷書之圖後。

世多謂官貪虎變。此殊不然。補蘿下車以來。廉潔自愛。衆所共知。一夜忽有虎入城。止於縣堂。涇雖山邑。此亦非恆有之異也。補蘿作山君圖。而題其上曰。乾隆九載三月十日。余履蘭石任。越五日既望。夜雨如晦。次日早。忽報有虎跡數十。在上堂之前。追其踪。入北門。跳躍十數圍墻而來。出西門。渡河而去。令獵戶搜取山中。不復得其蹤跡矣。因圖此以記異。鳳爲之贊曰。虎兮虎兮。宜竄山谷。渴飲清泉。饑餐野畜。曾感劉昆以遠颺。亦應法雄而馴伏。今豈苛政之猛於爾也。而城市亦不妨乎馳逐。抑當終以法除。而未易可言德伏。則爾尙率種類以遁藏。毋徒膏吾獵者長鎗。與利鏃。補蘿與舍弟季重最友善。卽以是圖爲贈。今藏於家。

補蘿攝涇篆四月而去。同人皆有詩贈行。惟舍弟季重文希一首最妙。詩曰。攀轅無計爲踟躕。宦海茫茫盡

畏途。好向林泉容小隱。何妨詩畫老名儒。歸舟不厭餐櫻筍。別浦誰堪聽鷓鴣。從此相思天海闊。君山縹緲立蓬壺。

李晴江方膺畫一竹致補蘿以見寄。題一絕於上云。此老風霜數十年。亭亭瘦骨向江天。未知善恨多愁者。臨別於今可黯然。時補蘿將去。故云。今藏於家。

季重又有次韻答補蘿一絕云。漁舸烟柳遠村灣。塵坌潛隨筆妙刪。門外不知春幾許。且從畫裏看青山。風致極佳。

葉千里總角友也。辛未會試榜發。成進士。而千里已於榜前一日卒矣。余哭之以詩。有句云。山遙水遠家何在。竹實桐花鳳不知。蓋反用張祐竹死桐枯鳳不來之句。警雖不逮。而悲則何窮耶。

俞蘭野文掄以事赴郡。道述所見。而作詩曰。魚脫網。深得杜陵樂天新樂府之意。余以其設爲問答。詞意明

白。故不復詮次其事。詩曰。終日河邊立。舉網無一魚。頭髮半黑白。蒿目但歎噓。二客旁觀久。汝事何乃踈。水深裳衣濕。無事空躊躇。二客那得知。我本事詩書。薄田數百畝。家中頗有餘。一旦付河伯。征輸復不除。自顧無生理。聊事此清渠。盍且具災傷。給口可緩糧。我欲叩縣宰。縣宰如虎狼。但自肆吞剝。那管人災傷。此言一出口。禍機慘已藏。一客顏忸怩。一客意傍徨。二客默無語。歸途循夕陽。去一客返。汝言大不祥。若爲汝父母。汝言肆顛狂。不知不足罪。若或不能忘。問君汝何人。云是府正堂。長跪謝公祖。淚滿頭下搶。便可作歸計。母或致倉皇。寒風入夜急。惡役鳴銀鐺。週遭肆搜尋。盡室去他鄉。太守一言示。涸轍離困湯。太守者誰氏。李公名本樟。

章夔九鳳儀善詩。每有事外遠致。嘗賦落花云。縈風迴雪鬪輕盈。芳草連天慘別情。一徑綠遮沽酒旆。半肩紅歇賣花聲。只和好景惟三月。不奈消魂在五更。何處埋香同永恨。宮人斜畔又清明。五六頗得味外味。殆司空表聖所謂羚羊掛角無迹可求者耶。

萬枚卜明府。三泄吾涇。其再任以內艱去。三任以外艱去。臨行以詩爲別。余卽次其韻以贈行。有句云。解組兩逢天地否。建侯三告水雷屯。枚卜極推典切。復以詩來酬。有呼天人載滿船。月惜別詩吟一笛。風之句。亦清婉可人。枚卜名世寧。江陵人工書。

釋寰宗。

琳琳

幕山僧。工書善詩。以望海詩得名。詩云。澎湃匯羣川。蒼茫一片煙。浮槎懷此日。鞭石自何年。有

島多藏國。無涯恐墮天。曾經三淺後。待爾作桑田。所至縉紳皆與相接。歸自金陵。余與鄭傳與梓林雲階。沈碩來馬海門暨舍弟雲翔季重宅。三再姪穎存。同攜榼迎之。寰宗出鳩江贈別諸詩相賞。同人相與分韻賦詩。余分得八庚云。南國名流合有卿。放歌日日盼歸程。鳥啼竹院披雲入。人踏花橋倒屣迎。攜友判留溪月飲。與君重話石頭城。鳩江社侶休相妬。惠遠陶家是舊盟。

寰宗每成一詩。推敲累日。然乙常笑之。以爲賈島之流。若佛印參寥。必不若是。寰宗笑應之曰。唐人固當勝宋。寰宗七言。有巢鶴不刪荒徑樹。數鴉遲閉夕陽門。刻藤湘管裁春雪。茗椀爐香話夕暉之句。並清遠有致。

沈碩來。名行泰。余世弟也。詩入中晚。於宋尤近。放翁五言。如紙破窗邀月。簾欹竹引風。人情多白眼。書味薄黃金。衣霽常悔典。書亂急謀函。七言如自顧病身多感舊。更逢好節便生嗟。售書只當遭秦火。對竹常如接晉人。三日住城三日寺。一生拚醉一生仙。書不療饑香忍斷。貧如脫俗骨猶仙。雨肥野蕨拳擊地。風走村烟腰斷山。青蚨不用金皆土。白首無名草亦人。過澗路昏螢有照。到門客熟犬無驚。皆名雋有味。而

賦立秋夜句云。暗雨低螢照。微風變樹聲。此聯尤妙。所著有破窗吟。

碩來牙痛賦詩云。病與貧宜餐粥好。姪希天極愛此句。爲續之云。病與貧宜餐粥好。此君妙句更宜人。年來無病常餐粥。笑我無緣得掩貧。

希天咏背面美人得句云。舟中西子歸吳日。馬上昭君出塞時。一時傳誦。推爲絕唱。

鄭傳與秀才與釋寰宗同年月日時生。又俱以詩鳴。相交最篤。年三十。碩來作詩合壽之云。最是奇逢此日筵。共成花甲豈徒然。三生石上遺雙璧。一箇時間謫兩仙。儒釋不分真意氣。詩文并合舊因緣。只疑窮却君平算。且醉醺醺莫計年。

翟惇成國工於詠物。偶記其白貓一章云。百錢休論價平常。青消得甃此夜長。一幅舞雲裁短紵。五更落月在雕梁。啣魚有影窺冰甕。撲蝶無聲過粉牆。幾度花間覓不見。定應眠向繡毬傍。

少年留心科舉。不當以吟詠分其文思。制藝盛而詩道微。有由然也。然使人人皆詩。又豈有詩乎哉。茫茫今昔。來者其誰。以余所見。若胡韻仲承。翟禮維幹。國姪書常勳。蒼雨霖良。再姪沅苜帥。穎存友。廣皆後來之秀也。

先伯祖環石公。年方弱冠。卽操選於金陵。所刻八宗師考卷大雅集諸本。皆不脛而走四方。尋登賢書。以中翰令館陶。再遷奉新。調繁貴溪。擢晉州。以憂歸。遂不復出。居家惟杜門著述。以詩文提唱後學。一邑嚮風。蒸蒸興起。所著環石詩鈔八卷。已刻以問世矣。今年春。余既有涇川叢書之役。屬諸弟等檢遺藁。復得此三卷於故篋中。所紀皆舊聞軼事。以及諸前輩搜奇弔古之作。旣足備一邑之典。



故而往來贈答。奇篇警句。亦無不萃而集焉。蓋百數十年以來之文獻所徵。天不忍使之埋沒於蠹魚灰裏之中。而騰躍而出者也。爰不勝欣喜而付之梓。嘉慶五年四月二十四日。姪孫紹祖謹識。